



Broj: 05-1903-6-2/20  
Sarajevo, 17.06.2020. godine

Na osnovu člana 23. stav (1) tačka d) Zakona o Agenciji za bankarstvo Federacije BiH („Službene novine Federacije BiH“, broj: 75/17), člana 16. stav 1) tačka j) Statuta Agencije za bankarstvo Federacije BiH („Službene novine Federacije BiH“, broj: 3/18), člana 64. stav (1) tačka b), člana 70. stavovi (1), (3) i (6) Zakona o javnim nabavkama („Službeni glasnik BiH“, broj: 39/14) i člana 8. stav (2) tačka d) Pravilnika o uspostavljanju i radu Komisije za nabavke („Službeni glasnik BiH“, broj: 103/14), a na osnovu preporuke Komisije za javne nabavke iz Zapisnika o ponovnom pregledu i ocjeni ponuda u postupku javne nabavke usluga, u dijelu koji se odnosi na lot 1, broj: 05-1903-5-1/20 od 16.06.2020. godine, direktor Agencije za bankarstvo Federacije BiH donio je

## **ODLUKU**

### **o izboru najpovoljnijeg ponuđača u postupku javne nabavke usluga**

#### **Član 1.**

Prihvata se preporuka Komisije za javne nabavke iz Zapisnika o pregledu i ocjeni ponuda, broj: 05-1903-5-1/20 od 16.06.2020. godine i ugovor za javnu nabavku usluga internet provajdera za potrebe Agencije za bankarstvo Federacije BiH, u dijelu postupka koji se odnosi na lot 1, dodjeljuje se ponuđaču „Telemach“ d.o.o. Sarajevo.

#### **Član 2.**

Ukupna vrijednost ugovora iz tačke I. ove odluke, za period od jedne godine, iznosi 3.410,26 KM, bez poreza na dodanu vrijednost (PDV), što u konačnici sa uračunatim PDV-om iznosi 3.990,00 KM.

#### **Član 3.**

Ova Odluka bit će objavljena na internetskoj stranici Agencije [www.fba.ba](http://www.fba.ba), istovremeno sa upućivanjem iste ponuđačima koji su sudjelovali u predmetnom postupku javne nabavke, u skladu s odredbom člana 70. stav (6) Zakona o javnim nabavkama.

#### **Član 4.**

Za realizaciju ove odluke zadužuje se Odjel za opće i kadrovske poslove pri Sektoru zajedničkih funkcija.

#### **Član 5.**

Ova odluka stupa na snagu danom donošenja.

## **OBRAZLOŽENJE**

Odlukom o pokretanju postupka javne nabavke usluga, broj: 05-1903/20 od 13.05. 2020. godine, odobreno je provođenje postupka javne nabavke usluga internet provajdera za potrebe Agencije za bankarstvo Federacije BiH (u nastavku: ugovorni organ). Javna nabavka provedena je putem konkurentskog zahtjeva za dostavu ponuda, a kriterij za dodjelu ugovora je najniža cijena tehnički zadovoljavajuće ponude. U skladu s članom 35. Zakona o javnim nabavkama Obavještenje o nabavci, broj: 3010-7-2-137-3-34/20, objavljeno je na portalu javnih nabavki ([ejn.gov.ba](http://ejn.gov.ba)), 15.05.2020. godine. Nabavka je podijeljena na dva lota, ukupne procijenjene vrijednosti od 8.000,00 KM, bez poreza na dodanu vrijednost (PDV), odnosno 4.000,00 KM po svakom lotu.

Komisija nadležna za provođenje predmetnog postupka utvrdila je da su ponude po ovom postupku nabavke dostavili slijedeći ponuđači: „Team Consulting“ d.o.o. Sarajevo, „Logosoft“ d.o.o. Sarajevo, „Mtel“ a.d. Banja Luka i „Telemach“ d.o.o. Sarajevo.

Na osnovu izvršene analize i ocjene prispjelih ponuda u pogledu utvrđivanja njihove prihvatljivosti u odnosu na kvalifikacijske uslove utvrđene u tenderskoj dokumentaciji, komisija je utvrdila određene nepravilnosti u ponudama svih ponuđača, zbog čega su iste ocijenjene neprihvatljivim, koje kao takve ne mogu biti predmetom daljnjeg razmatranja niti vrednovanja, te dala preporuku direktoru ugovornog organa da donese odluku o poništenju predmetnog postupka, saglasno članu 69. stav (2) tačka d) Zakona o javnim nabavkama.

Pridržavajući se uputa o pravnom lijeku, saglasno članovima 97. i 101. Zakona o javnim nabavkama, ponuđač „Telemach“ d.o.o. Sarajevo (u nastavku: žalilac), u propisanom roku, izjavio je žalbu na Odluku o izboru najpovoljnijeg ponuđača, broj: 05-1903-6/20 od 01.06.2020. godine, koju je ugovorni organ zaprimio 15.06.2020. godine.

Po prijemu predmetne žalbe, u skladu s članovima 97. i 100. Zakona o javnim nabavkama, utvrđeno je da je žalba blagovremena, dozvoljena i izjavljena od ovlaštenog lica, čime su ispunjene procesne pretpostavke za razmatranje iste.

Žalilac u žalbi navodi da ispunjava sve zadane uslove za kvalifikaciju ponuđača, ističući da posjeduje ASN, te da su podaci o tome javno dostupni na linku: <https://bgpview.io/asn/42560>, navodeći da tenderskom dokumentacijom, naročito u njenom 3. poglavlju – Uslovi za kvalifikaciju ponuđača, tačka 1.4 (Tehnička i profesionalna sposobnost), nije traženo da ponuđači dostave posebnu izjavu o posjedovanju ASN-a – Autonomous System Number.

Dalje navodi da je uredno dostavio potpisan i ovjeren obrazac izjave o prihvatanju općih i posebnih uslova tenderske dokumentacije, koji je sastavni dio tenderske dokumentacije, čime je potvrdio da ispunjava navedeni uslov.

Razmatrajući po žalbi ovog ponuđača u pogledu ispunjavanja zadanih tehničkih uslova iz tenderske dokumentacije, komisija je u ponovljenom postupku ocjenjivanja ponude utvrdila da su navodi žalioaca u cijelosti osnovani te da isti ispunjava zadane uslove za kvalifikaciju ponuđača, s obzirom na to da u tenderskoj dokumentaciji, niti u jednom njenom dijelu, pa tako ni u Poglavlju 3. – Uslovi za kvalifikaciju ponuđača, tačka 1.4. (Tehnička i profesionalna sposobnost), nije postavljen uslov da su ponuđači dužni dostaviti posebnu pisanu izjavu o posjedovanju posjeduju ASN-a – Autonomuos Systwm Number.

Temeljem naprijed navedenog, cijeneći utvrđeno činjenično stanje komisija je utvrdila da su žalbeni navodi žalioaca osnovani i da je njegova ponuda prihvatljiva te dala preporuku da se postojeća Odluka o poništenju postupka javne nabavke usluga, broj:05-1903-6/20 od 01.06.2020. godine, shodno članu 100. stav (3) Zakona o javnim nabavkama, stavi van snage i donese nova odluka o izboru najpovoljnijeg ponuđača kojom će se ugovor po predmetnom postupku nabavke dodijeli privrednom društvu „Telemach“ d.o.o. Sarajevo, koji je dostavio ponudu na iznos od 3.410,26 KM bez poreza na dodanu vrijednost (PDV), što u konačnici s uračunatim PDV-om iznosi 3.990,00 KM, kao najpovoljnijem ponuđaču u predmetnom postupku nabavke.

Uzimajući u obzir sve navedeno, primjenom člana 64. stav (1) tačka b) i člana 70. stavovi (1), (3) i (6) Zakona o javnim nabavkama, odlučeno je kao u dispozitivu.

### **Pouka o pravnom lijeku:**

Protiv ove odluke može se izjaviti žalba ugovornom organu – Agenciji za bankarstvo Federacije BiH, u roku od 5 (pet) dana od dana prijema ove odluke, u skladu s članovima 97. i 101. Zakona o javnim nabavkama. Žalba se podnosi u pisanom obliku – u tri primjerka.

### **Dostaviti:**

1. Ponuđačima u postupku
2. Sektoru zajedničkih funkcija
3. a.a.

